

Dent per dent amm vegnn in ment
ur mé paees d'altri temp
fai de gent modesta e queta
indoca un poo d' ann fa a som nasuda
e fina adess a som visuda
e podi miga faa a men da pensaa
a tucc quii gent d'una volta
che a v'un a v'un ié pasaat là
ma che ogni ann per di di Sant
a ritrovi li tucc insema
pien de fiò ar cimiteri.

Gent bonascia o un poo musona
gent alegra generosa o un poo testona
gent importanta e gent inscì ,inscì.
Tuta gent insoma che ha visuut
altri moment, quand ra vita
L'eva piena de fastidi e de fadiig.

ma però ur temp per loor al coreva miga
inscì tanto impresa come adess
e ra gent dar mè paees l'eva bona
da divertiss con pooch e nient :
tre osterii con ur giogh di bocch
un para de canvett coi formagin
ur nostran e ra gazösa in dar tazin.

I regioo a ra domenga i riposava
e i fumava un mezz toscan o ra so pipa
denanz a un quint de vin i tirava fin a sira,
intant che i donn dopo mesa foo dra porta de cà
i ciciaràva i faseva ur scalfin
i ramendava o i ricamava, e numm fiorett
sevom padron da tucc i straad e tucc i piazz
perchè allora, a giràva dumà dent per dent
un quaii carett ma sempro leent.

D'automobil a gh'é n'eva una sola
quela dar Paolin, ur macelar
un sol telefon, quell di Righin
e solo i sciori i ciapava ur tram da Din.
Quanto emm giugaa a scondess e a ciapass
dent per paees, ma, quand sonava r'Ave Maria
tucc in cà e drizz in lecc senza faa un cipp.

Quanti regord e un tantin de nostalgia
per quell paees da tanti ann fa
fai de geent un poo bonascia o un poo musona
geent alegra generosa o un poo testona
geent importanta e geent inscì inscì
indoca un poo d'ann fa a som nasuda
e fin adess a som visuda